

Promer Ministro Henny Eman

GOBIERNO KIER REFLEHA PARTI DI SU MANEHO DEN E PRESUPUESTO DI 1995

ORANJESTAD(AAN) -- Ayeramainta den Sonesta Hotel a tuma lugar e conferencia di presupuesto caminda tur e hefenan di departamento y Ministronan tabata presente.

Na e ocasion aki, Promer Ministro Eman a indica cu e conferencia special aki ta debi na circunstancianan excepcional cu nos ta bibando aden.

Dia 1 di September un gobierno nobo a sinta y a haya un situacion cu no tabatin un presupuesto trata ainda di 1994 y no tabatin un presupuesto entrega na Parlamento ainda pa 1995.

Eman a mostra cu Constitucion ta prescribi cu 1 di



September, e presupuesto di e proximo aña mester ta na Parlamento. Ayera mainta a trata hustamente e presupuesto ey pa entrega esaki na Parlamento dentro di algun

dia y ta spera di pase den Parlamento promer cu fin di aña.

Eman a splica cu gobierno tabatin cu scoge den dos alternativa:

1) Entrega e presupuesto manera e tabata den concepto cu e gobierno cu a sali a laga atras y purba di hacie un "hamer stuk" pasobra e no ta refleha e maneho di e gobierno nobo.

2) Trata di tur manera ainda, aunque cu casi no tabatin tempo mas, purba di refleha un parti di e maneho di e gobierno nobo den e presupuesto.

Gobierno a escoge pa e ultimo esta di haci un es-

fuerzo maximo pa ainda laga e presupuesto refleha e gobierno nobo.

E motibonan cu gobierno ta haci esaki ta:

** Gobierno ta di opinion cu e derecho di presupuesto ta e fundeshi di e sistema democratico y pesey, respetando esaki mester percura pa Parlamento haya un

presupuesto cu gobierno por sostene mas tanto posible como un presupuesto realistico cu ta refleha e maneho financiero di gobierno.

** Gobierno ta di opinion cu no solamente pa Parlamento mester tin un presupuesto realistico, sino pa e Ministronan cu ta forma e gobierno ta bon pa pasa den esfuerzonan maximo pa cada Ministro conoce su presupuesto, sa kico e presupuesto ta significa pa e lineanan nobo di maneho pa asina por sigura un maneho trankilo pa e periodo nan dilanti.

** E maneho nobo ta encera entre otro, revoca e medidanan pisa cu a worde tuma na Juli 1993.

E revocacion di e medida ariba importacion esta e 5% a trece consecuencia pa e presupuesto di 1995 cu tabata cla den concepto.

A resulta cu e presupuesto di 1995 tin un fayto di 58 Miyon Florin cu a worde ocasiona door cu gobierno nobo a revoca e medida di

importacion. E revocacion aki a pone un fayto di 30 Miyon Florin.

Ademas tabatin den e concepto di presupuesto di 1995 poni door di e gobierno anterior, un cantidad di medidanan nobo cu lo percura pa un entrada di 13 Miyon Florin.

E maneho nobo di e gobierno nobo cu a sinta 1 di September 1994 ta costa 10 Miyon mas na gobierno y ya caba tabatin un fayto di 5 Miyon caba ariba presupuesto manera e tabata den concepto.

Esaki ta significa cu gobierno ta saliendo for di e punto cu tin un deficit ariba e presupuesto di 1995 di 58 Miyon Florin.

Entre ayera, awe y posiblemente mayan, e grupo aki lo reuni te ora cu a traduci e maneho nobo den cifranan pa e presupuesto di 1995, pa asina tur e departamentonan concerni por prepara di dialuna en adelante pa e presupuesto aki bay Parlamento mas pronto cu ta posible.

ENTRE 300 CU 350 EMPLEADO PUBLICO POR OPTA PA RETIRO VOLUNTARIO

ORANJESTAD (AAN)-Ministro Armand Engelbrecht, Titular di e cartera di Finanzas, a elabora tambe e ley di Retiro Boluntario cu tin tur atencion di gobierno, como un medio eficiente pa spaar placa y reduci gastonan for di caha di gobierno. Den cortico, Titular di Finanzas a menciona e punto aki den conferencia di prensa cu gobierno a tene recientemente. Ministro Engelbrecht ta splica cu gobierno lo entrega pronto e Ley di Retiro Volutario na Parlamento.

Ta asina aki, Ministro ta bisa, cu actualmente tin mas of menos 10 miyon Florin bloquea na Banco Central cu ta tene cuenta cu retiro boluntario.

Tin, Ministro ta bisa, entre 300 cu 350 empleado publico cu lo por haci uso di e ley di retiro boluntario loke por trese un alivio pa presupuesto 1994, y otro aña ta

intencion pa sigui cu e ley aki, pa trese un alivio tambe den e presupuesto 1995.

"BLACK" IS BEAUTIFUL!!



TELEFONNAN
DI DIARIO
26747
FAX
28551